



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАР

2017 жылғы 28 наурыз

Қазақстанның сақтандыру нарығы негізгі көрсеткіштердің оң серпінін көрсетуде

Сақтандыру нарығын дамыту мәселелерін бүгін Алматы қаласында дөңгелек үстел барысында ҚР Ұлттық Банкінің және жетекші бұқаралық ақпарат құралдарының өкілдері талқылады.



Сақтандыру нарықтарының жай-күйі мен перспективалары туралы [презентациямен](#) ҚРҰБ Сақтандыруды қадағалау департаментінің директоры Жанат Құрманов сөз сөйледі. Ол еліміздің сақтандыру нарығындағы күштердің соңғы жылдарда қалай өзгергенін атып берді, сондай-ақ активтердің, меншікті капиталдың және сақтандыру резервтерінің серпіні бойынша деректер келтірді.

Ж. Құрманов хабарлағандай, 2017 жылғы 1 қаңтардағы жағдай бойынша Қазақстан Республикасының сақтандыру секторында 32 сақтандыру ұйымы, 15 сақтандыру брокері және 59 актуарий бар. Жиынтық активтер мен меншікті капитал тиісінше 857 млрд. теңгені және 402 млрд. теңгені құрады. «Активтер құрылымында айтарлықтай үлесті (43%) сомасы 373 млрд. теңге болатын бағалы қағаздар құрайды. Екінші деңгейдегі банктерде орналастырылған салымдар жиынтық активтердің 27% үлесімен, 228 млрд. теңгені құрайды», – деп хабарлады Ж. Құрманов, ол сақтандыру резервтері сомасының өткен жылмен салыстырғанда 9%-ға ұлғая отырып, 412 млрд. теңге құрағанын да айта кетті.

Тұтастай алғанда, ҚРҰБ өкілінің айтуынша, Қазақстанның сақтандыру нарығы 2016 жылы негізгі көрсеткіштердің оң серпінін жалғастырды және сақтандыру сыйлықақыларының соңғы 5 жылдағы айтарлықтай өсуін көрсетті.

Сақтандыру сыйлықақысының көлемі 2016 жылы өткен жылмен салыстырғанда 24%-ға ұлғая отырып, 357 млрд. теңге болды. Ж. Құрманов «сақтандыру ұйымдары негізгі көрсеткіштерінің өсуі, бірінші кезекте, мүлікті ерікті және міндетті сақтандыру бойынша сақтандыру сыйлықақылары көлемінің өсуі есебінен қамтамасыз етілгенін» түсіндірді.

«Сақтандыру нарығында сақтандыру шарттарын жасасу және сақтандыру оқиғаларын реттеу кезінде көрсетілетін қызметтер сапасының айтарлықтай артуы, халыққа арналған ерікті сақтандыру өнімдері тізбесінің кеңеюі, сақтандыру қызметтерін тікелей сатудың, оның ішінде міндетті ерікті сақтандырудың сақтандыру полистерін онлайн-сатудың дамуы байқалады. Сақтандыру ұйымдарының ақпараттық қызметінің жандануы азаматтардың қаржылық сауаттылығын, сақтандыру ұйымдарына және тұтастай алғанда сақтандыруға деген сенімнің артуына ықпал етеді», – деп жалғастырды Ж. Құрманов.

Оның айтуынша, сақтандырудың заңнамалық базасын жетілдіру, сақтандыру нарығының инфрақұрылымын дамыту, сақтандыру ұйымдарының қаржылық орнықтылығын арттыру бойынша қабылданған шаралар сақтандыру қызметтерін тұтынушылардың құқықтарын және мүддесін қорғауды күшейтуге ықпал етті.

«Сақтандыру секторын тиісінше дамыту және жұмыс істеуі мақсатында сақтандыру омбудсманы, Сақтандыру төлемдеріне кепілдік беру қоры, сақтандыру жөніндегі деректердің бірыңғай сақтандыру базасы, актуарийлер қоғамы сияқты инфрақұрылымдық ұйымдар құрылды, – деді Ж. Құрманов. – Сақтандыру сыйлықақыларының серпінді өсуіне қарамастан, олардың ІЖӨ-дегі үлесі төмен деңгейде қалып отыр. Бұл Қазақстанның сақтандыру нарығы әлеуетінің зор екендігін білдіреді. Сақтандыру сыйлықақыларының халықтың жан басына шаққандағы ІЖӨ-ге қатысының төмен болуымен көрінетін өсудің игерілмеген әлеуетінің арқасында сақтандыру болашақта да жоғары қарқынмен дамитын болады». Қазақстан экономикасы мен әлеуметтік саласының заманауи даму сатысы, жаһандану мен әлемдік жүйеге белсенді ықпалдасу процестері, ДСҰ-ға кіру отандық сақтандыру индустриясының алдына жаңа мақсаттар мен міндеттер қояды, оларды іске асыру қаржы нарығын, оның ішінде сақтандыру нарығын дамыту үшін жағдайлар жасауды талап етеді, деп қорытындылады ҚР қаржы реттеушісінің өкілі.

Ұлттық Банкте ҚР сақтандыру нарығын дамыту жөніндегі 2017 жылға арналған жұмыстың негізгі бағыттары жайында айтып берді

ҚР Ұлттық Банкі қаржы нарығын реттеуші ретінде, бірінші кезекте қаржылық қызметтерді тұтынушылардың құқықтарын қорғауды қамтамасыз етуге, жалпы алғанда қаржы секторын дамытуға және қолдауға, сақтандыру ұйымдарының қаржылық сенімділігін арттыруға бағытталған шаралар қабылдайды. Бұл туралы бүгін БАҚ-тың қатысуымен өткізілген дөңгелек үстел барысында ҚРҰБ-тың Сақтандыруды қадағалау департаментінің директоры Жанат Құрманов хабарлады.

Ол отандық сақтандыру секторын одан әрі дамыту, халық тарапынан оған деген сенімді арттыру үшін ҚР Ұлттық Банкінің Қазақстан Республикасы Үкіметінің 2017 жылға арналған заң жобалау жұмыстары жоспарына енгізілген «Қазақстан Республикасының кейбір заңнамалық актілеріне сақтандыру және сақтандыру қызметі мәселелері бойынша өзгерістер мен толықтырулар енгізу туралы» Қазақстан Республикасы Заңының жобасын әзірлеуді жоспарлап отырғанын хабарлады.

Ж.Құрмановтың айтуынша, заң жобасы Қазақстан Республикасының қаржы секторын дамытудың 2030 жылға дейінгі тұжырымдамасында көзделген бағдарламалық

міндеттерді шешуге бағытталған және ҚР заңнамалық актілеріне ерікті және міндетті сақтандыру бойынша өнімдер мен қызметтер нарығын дамыту, сақтандыру нарығына кәсіби қатысушылардың және инфрақұрылымдық ұйымдардың қызметін жетілдіру мәселелері бойынша өзгерістер мен толықтырулар кешенін енгізуді көздейді.

Ж. Құрмановтың айтуынша міндетті сақтандыру бойынша оның орнықты дамуына кедергі жасайтын қалыптасқан проблемаларды шешу, оның ішінде сақтандыру полистерін электрондық нысанда өткізу мүмкіндігін енгізу; шет елге баратын қазақстандық туристерді қорғау тетіктерінің тиімділігін артыру (туристің өзін және оның мүлкін сақтандыру арқылы); сақтанушы үшін сақтандыру міндетті болып табылатын және сақтандырудың егжей-тегжей талаптары тараптардың келісімі бойынша клиент қызметінің ерекшелігі мен мүдделері ескеріле отырып айқындалатын міндеттелген сақтандыру ұғымын енгізу және т.б. шаралар қабылданатын болады.

Журналистердің ерікті сақтандыру бойынша қандай шаралар қабылданатыны туралы сұрақтарына Ж. Құрманов қолданыстағы салық жеңілдігін сақтандыру сыйлықақысынан сақтандыру төлеміне ауыстыру арқылы өмірді жинақтап сақтандыру өнімдерін дамыту үшін жағдай жасау қажет деп жауап берді.



Оның айтуынша, бұл салықтық басқару жүйесін және халық үшін сақтандыруды жеңілдетеді. Осы арқылы қолданыстағы жеңілдікті алу рәсімі жеңілдей түседі, бұл өмірді жинақтап сақтандыру бойынша сақтанушылардың санын ұлғайтуға мүмкіндік беріп, тиісінше, бюджетке салық түсімдерінің өсуін қамтамасыз етеді, – деп атап өтті Ж. Құрманов. Сондай-ақ, ол ҚРҰБ-тың ерлі-зайыптыларға арналған зейнетақы аннуитеттерін енгізу туралы ұсынысын айтып өтті, олар ерлі-зайыптылардың біріне сақтандыру ұйымына аударылған зейнетақы жинақтарын мұраға алуына мүмкіндік береді, соның нәтижесінде мемлекеттік бюджетке түсетін әлеуметтік салмақ төмендейтін болады.

Ж. Құрманов қазіргі кезде түзетулердің Қазақстан қаржыгерлерінің қауымдастығы алаңында қызу талқыланып жатқанын және, жалпы алғанда, сақтандыру нарығына қатысушылардың, мүдделі мемлекеттік органдардың және Қазақстан Республикасының «Атамекен» Ұлттық кәсіпкерлер палатасының қолдап отырғанын қоса айтты. «Осы және басқа да шаралар секторды реттеумен байланысты анықталған проблемалардың бір

бөлігін шешуге мүмкіндік береді, сапалы әрі қолжетімді сақтандыру қызметтерін дамытуға, және сол арқылы халық пен бизнестің сақтандыру нарығына деген сенімін арттыруға ықпал етеді», – деді Ж. Құрманов.

Толық ақпаратты мына телефон арқылы алуға болады:

+7 (727) 270 45 85

e-mail: press@nationalbank.kz

www.nationalbank.kz